



ル 5
3150.
17



門 儿 5
號 3150
卷 17

黔南識略卷二十五

貴州巡撫長白愛必達撰

平遠州

平遠州在府治東南一百四十里省城西二百二里
明以前為水西比喇壩地

國朝康熙三年設平遠府後改為州隸大定府設知州
一學正一訓導一吏目一其境東至貴筑縣界一百
里西至水城廳界六十里南至鎮甯州界六十五里
北至本府界六十里東南至安平縣界八十里西南
至郎岱廳界八十里東北至黔西州界六十五里西

北至水城廳界六十里州舊爲諸羅窟穴平定以後
屹爲巖疆昔之議戍守者曰其東路由威清至象鼻
嶺嶺下爲簸箕河渡河爲雷打坡兵踞厓巔下跨大
河以探象鼻則威清之路可以無梗也東北路來自
黔西者爲紅巖爲猓結河河之南爲白沙塘崇坡密
箐行者膽掉從大定入爲北路自此渡過六歸河南
上青岡嶺嶺路逼天飛鳥欲絕試屯兵于白沙塘東
渡猓結以扼紅巖之險結壘以戍青岡則可以北阻
六歸而策大定復據比渡以爲藩籬如此則三處相
爲犄角平遠腹心可帖席臥矣城周四里五分計八

百二十六丈門五水關三城濠深一丈寬一丈五尺
環城皆山東山在城東二里石屏雲磴致爲幽奇城
郭林巒一覽可盡又有紗帽山天馬山玉屏山懸霧
山在城東五十里四面陡絕人跡罕通頂平闊可十
畝舊有蓮池泉水澄碧晨夕多霧火石山在城東七
十里其石擊則火出鳳凰山在城西南三十里高四
里山頂平闊林麓坦衍穆將軍戰壘在焉白巖山在
城西十里碧山在城西二百里崖石峭峙下臨大河
深不可測墨續山在城北十里孤峰獨立黝若染墨
下有墨溪紅崖在城南六十里頽壁如霞明天啟三

年巡撫王三善攻大方進營紅崖連破天台水腳等
七圍奪其天險別將亦追至鴨池河奪其戰象遂深
入至紅鳥岡是也牛角壘頂寬平四面皆絕壁畫眉
壘在城東九十里簸朶河側可容數千人石門塚口
猶存白馬壘在城西三百里上可容萬人馬隴箐在
城東十里入省大路縱橫三十里內有壘可容千人
卽織金關相次有火灼堡明天啟三年王三善師抵
大方安位走火灼堡安邦彥竄織金旣而三善爲降
賊所賣師陷邦彥復熾總督蔡復一率兵直入織金
關關皆壘隘將士用巨斧開之攀藤穿竇而入賊戰

敗遁深箐卽此地也比德箐在城西一百二十里縱
橫約二百里懸崖鳥道行者卻步小穿洞在城東一
里有水出焉大穿洞在城西三里形似覆鐘又有石
佛高丈許又東二里有賓興洞東北三里有蓮花洞
石似蓮花水從上湧出下有池果忠洞在城東六十
里洞口壘石尙存土人避兵處也納額洞在城北四
十里洞有二層石門塚口皆在白鳥洞在城西十里
中有大水楊保洞在城西五里有水順流援梯方可
入石牆今存奢香洞在城東三十里昔奢香遊息此
處故名龍洞在城東三里洞有深潭傳有龍入洞今

石壁宛成龍形穿城一水導源鳳凰山下經卜牛塘
自城南入會東南兩龍潭水合流出北門又合別流
東北行十五里穿山腹而出入簸朶河簸朶河在城
東一百里源出安順三岔河入大定界爲六歸河深
數十丈兩岸危峰礙日沈碧不流臨之冷人毛骨州
境水以此河爲最大又城東三十里有織金河
里有墨溪五十里有平溪南五里有渡路溪通安順
大路水漲難渡南五十里有比古河西北三十里有
墮極河又六十里有武著河北十里有墨溪五十里
有慕恩溪俱注簸朶河城內外龍潭以百數惟東南

兩潭稱最織金關在城東十里通會城及安平縣鳳
凰關在城南三十里通安順府及鎮甯州望城關在
城北五里通府屬及威甯州土地關在城北十里通
黔西州穿洞關在城南五十里通安順府渡口七東
一百里爲簸朶渡東九十里爲七伯房渡通安順亦
通會城之簸渡阻水往往繞此而濟東一百二十里
爲思臘渡通安平縣明志安順府有思臘河接水西
界又土司傳黔兵由普定渡思臘河卽此北六十里
爲猓結渡通黔西州南九十里爲三岔渡接鎮甯州
界北八十里爲六歸渡接府屬界州轄向化慕恩懷

忠興文敦仁太平六里舊有崇信時豐歲稔三里乾隆四十一年撥隸水城管轄田畝肥瘠視水源遠近現在成熟田一萬一千九百九十七畝有奇減則田一萬六千八十五畝有奇共徵米六千一百二十六石七斗八升有奇徵銀一百八十三兩二錢三分有奇年終解繳藩庫常平倉貯穀三萬三千六百六十八石六斗有奇社倉六處貯穀五百一石二斗有奇學額原額文武生皆十二名建有鳳西書院義學一城中駐劄副將一員中軍左營都司一員右營守備一員千總四員把總八員外委六員額外四員馬步

兵丁七百一十名分防簸渡汎外委一員兵二十七名安莊汎千總一員外委一員兵九十九名歸集汎把總一員兵二十四名務卜汎外委一員兵十六名黑勝汎把總一員兵二十六名裸龍汎千總一員兵十五名白沙汎外委一員兵十三名以個汎把總一員兵二十四名內除黑勝歸集務卜以個汎兵丁口糧就近赴水城支放安莊一汎就鎮甯支放外餘俱于秋糧內支給場市十五物產雄黃黑鉛葦器熊胆麝香雞縱鸚鵡白鷗箐雞雞修尾白羽綠以黑周圍如深墨極可觀原設稅口四米裸阿女二稅撥

歸水城徵收批解現存本城彙結二稅額徵羨銀九十三兩九錢六分稅羨銀五百一十五兩苗有羅鬼狃家蔡家獐家花苗犴猪各種惟羅鬼一種諸苗多尊奉之迄今冠婚喪祭漸遵禮制非復往時習尚矣有土目無土司嘉慶六年新設土守備二員土千總一員把總四員外委六員除病故辭退現存把總四員餘詳府志

黔西州

黔西州在府治東一百一十里省城西北二百里明以前爲安氏水西地

國朝康熙三年置黔西府二十二年改爲州屬大定府二十六年改大定府爲州屬威甯府雍正八年陞大定爲府州仍屬焉設知州一學正一訓導一吏目一其境東九十里至修文縣境以陸廣河爲界西六十里南二十里至平遠州境以猓結河爲界西至本府界五十五里北至遵義縣屬古樓塘界一百二十里東南五十五里至清鎮縣境以鴨池河爲界西南至本府界四十里東北一百四十里至遵義縣境以沙溪河爲界西北一百五十里至四川永寧縣境以魚塘河爲界內有山徑險峻之處必須紆道者自七八

黔南諸山卷之十五
十里百餘里至三百餘里不等州負山倚河爲水西之門戶黔蜀之藩維城舊爲水西城僅存遺址乾隆二十三年修建登以石周四里三分計八百六十七丈門五獅子山在州署後旁有山小而圓名繡練山牛飲山在城內上有石如牛金雞山在城東八十里頂有石雞明時置驛于山下其東五十里爲奢香驛又五十里爲陸廣驛今廢白塔山在城西北一百里一峰卓石儼如白塔上有泉極清涼將軍巖在城西北百里相傳山鳴則兆兵革十萬溪大箐在城東方輿紀要稱野記自新添山砦西二十二里入箐所溪

水回環山巒峭拔又六十里懸崖絕壁無徑可行逕望一山甚危峻四面設屯寨卽此又東北有杓裏箐路近遵義中有平川可容數萬人入路極險康熙三年大兵生擒安坤于杓箐卽其地其西有莫隴法地壘四面絕壁夷人因爲石垣上營木城壘後有閒道可登比喇箐在城西北三十里四面深阻平廣容數萬人均昔時羅鬼所負嶠也箭筒壘在城南三十里下臨大河頂有泉冬夏不竭下有萬家洞洞內人跡宛然深邃莫測傳昔有白衣者常牽犬出入云亦名白衣洞黃崖洞在城東北十里陸廣河在城東北九

黔南諸山卷之二十五 七
十里卽烏江之上流由畢節之七星河經大定爲六
歸河又經城東南爲鴨池河有渡曰鴨池渡又西爲
陸廣河有渡曰陸廣渡舊爲水西驛道明季安邦彥
之亂巡撫朱燮元檄雲南兵下烏撒四川兵下畢節
親率大軍駐陸廣以逼大方卽此地再下爲黃沙渡
沙溪之水注之裸革河卽平遠簸朶河之下流經州
境入陸廣河西溪河在城西出崖洞小溪合楠木溪
裸隴河高家河等水注陸廣河西門河在城西上洪
下洪合而成河其下流爲沙壩河又流爲洛則河入
渭河又有隴溪河安樂河入焉又有以濟河出州西

北上合打鼓寨水及渭河烏慶河並合陸廣河州轄
黔興西城安德崇善敦義永豐新化新民平定九里
現在成熟田土二萬九千八百八十九畝有奇額徵
秋糧並苡折米共七千一百五十三石有奇除支兵
糧廩精外餘米變價解繳道庫徵銀二百九十六兩
有奇常平倉貯米一萬四千九百二十三石有奇義
倉一設城東關外官爲捐穀一設城內南廂一設元
豐里一設平定里一設安德里皆民自行捐置學額
歲科文武生皆十五名建有獅山書院義學二稅口
二額解正羨銀二千七百二十二兩有奇又額收各

當店牙帖銀七兩場市二十苗有猓獾狨家宋家蔡家獾家花苗白苗青苗狍猪六額子十種其俗詳見各處漢莊二百四十六計二萬八千六百六十九戶共十二萬四千三百二十五名口苗寨二百有九計一萬一千二百二十三戶共四萬五千二百六十三名口附居苗寨客民一千一十九戶共五千二百六十名口設一營八汛三十七塘城中駐劄黔西營遊擊一員守備一員千總一員把總一員外委二員額外委二員兵三百一十六名分防鵬池汛外委一員兵一十一名鎮西汛千總一員兵三十六名西溪

汛外委一員兵一十八名陸廣汛外委一員兵二十
二名沙溪汛把總一員兵三十名沙土汛把總一員
兵二十一名石革鬧汛把總一員兵二十三名黃沙
渡汛外委一員兵九名無驛遞東赴省會西赴本府
爲通衢其俗民多訟夷好鬥平定一里遠隣蜀之永
甯距城二百餘里奸民多隱匿焉此拿彼遁山洞峻
深潛踪最易且戶居皆猓獾無漢民歲稍歉則爲竊
盜餘與他屬同

黔南識略卷二十五終

黔南識略卷二十六

貴州巡撫長白愛必達撰

威甯州

威甯州在府治西南四百九里省城西北七百三十里舊名巴兀姑後為巴的甸自昔為烏蠻之地唐時烏蠻之裔有烏些者居此傳至阿蒙始盡有巴的甸地宋時烏些之後日強大因取其遠祖烏撒為部名曰烏撒部元至元十年內附十三年置烏撒路招討司十五年改為軍民總管府二十一年改軍民宣撫司二十年陞為烏撒烏蠻宣慰司屬雲南行中書

黔陽府志卷之二十一
省明洪武十五年置烏撒府屬雲南布政司十六年
改屬貴州布政司十七年陞爲軍民府烏撒衛洪武
十五年置屬雲南都司永樂十一年改隸貴州都司
國朝康熙三年土知府安重聖與安坤謀叛討平之以
其地置威甯府省烏撒衛入焉領平遠大定黔西三
州畢節永甯二縣雍正八年陞大定爲府改爲州隸
府設知州一學正一訓導一吏目一巡檢一駐得勝
坡其境東至畢節縣界一百九十里西至雲南昭通
府界一百四十里南至雲南宣威州可渡河界八十
五里北至雲南鎮雄州界二百一十里東南至水城

通判界一百三十里西南至雲南東川府牛欄江界
二百二十里東北至鎮雄州界一百九十里西北至
鎮雄州夷良州同界一百三十里廣三百七十七里
袤二百九十五里州治爲烏龍箐地前臨可渡後倚
烏蒙雖在西隅實當衝要城本爲烏撒衛城明洪武
十四年征南將軍傅友德克烏撒始建城周五里七
分計一千八十丈有奇高一丈二尺門四飛鳳山在
城東大隱山在城東三里百級山在城南二里石龍
山在城南二十里蜿蜒起伏大路經其上鳳嶺在城
二里亦名瞭高山烏門山在城東北一里兩崖對

時如門翠屏山在城東北二十里上多杉檜得勝坡
在城西北十里普陀崖在城內千丈厓在城西南下
臨可渡河水在城東北五十里烏蒙箐在城西五
十里又十里爲官坊海子道出雲南昭通者也華蓋
洞在城東南一百七十里有門可入中容百餘人南
海子亦名石海又名草海子在城南門外春夏水漲
瀰漫數十里遠望若海迤而西北爲北海子昔築二
壩以積水漸成陂澤八仙海子在城西南十里列石
八如人狀黔之烏江源自八仙海營菩薩汎露州各
溪澗流出經大定貴陽諸府界至遵義府始名烏江

至四川涪州入大江洪亮吉水道考以爲水經注延
江水出犍爲南廣縣東至牂柯營縣又東屈北流至
巴郡涪陵注更始水卽此水也盤江源出州西一百
五十里南流入雲南霑益州界又東北流二百里仍
逕州東南九十里謂之可渡河有橋曰可渡橋山曰
分水嶺明史地理志烏撒軍民府下注云西有盤江
出府西亂石山中經府南爲可渡河是也七星河在
州西三十里縈繞山谷間經此須渡者凡七處故名
又有九十九渡水在城西南百里又桃花溪在城南
二十里皆流合可渡河五道河在城東野馬川性惡

不可飲龍井在飛鳳山麓水清澈天旱不竭城內無
水汲飲惟此水距城二里許近于城內掘四塘然不
可飲也龍潭灣在城東南八里深不可測湧珠泉在
城北噴沫如珠累累不絕三潮水在城北其水一日
三潮音如餅笙黔稱漏天威甯尤甚沈陰積霧淡旬
淫霖雖暑月猶擁裘諺曰烏撒天常披氈三日不雨
是神仙楊慎詩所謂易見黃河清難逢烏撒晴者也
駐城貴西兵備道一員舊駐安順康熙二十二年移
駐大定嗣兼轄鉛廠移駐州城州地分爲十里成
熟田一萬六千八百三十畝有奇地二萬四千五百

八十三畝有奇又屯陸地一百九十三分有奇徵米
二千四百六十三石有奇徵菽二千九百三十五石
有奇俱以供支鎮標兵糧不敷者由大定水城畢節
三處撥運徵丁銀二百三十六兩有奇常平倉貯穀
一萬二千五百一十七石有奇米四千八十石有奇
菽三千二百三十六石有奇社米四百六十九石兄
姑烏撒兩稅每年額徵課羨銀五千五百四十兩有
奇建有湧泉書院舊營學一新設民學二康熙三年
改衛爲鎮雍正六年改鎮爲營九年改營爲協乾隆
二年復改爲鎮現駐劄總兵一員遊擊一員都司一

員守備二員千總二員外委千總二員把總二員外
委把總四員額外委把總九員馬步兵丁一千五
百名設十二汛曰艾家坪菩薩塘水槽舖黑
張四舖瓦渣河得勝坡可渡橋天生橋長勝寨稻田
壩小米洛又新添二汛曰革遮黑石頭皆州境最險
要處也場市十二物產惟鉛為多媽姑羊角新發白
崖馬街猓納黑泥三家灣等廠額抽課及採辦白鉛
共四百二十八萬有奇柞子硃礦猓布曼等廠額抽
課及採辦黑鉛共五六十萬筋不等陳家溝銅廠額
辦銅六萬筋運供大定鼓鑄其民夷多漢少漢人多

江南湖廣江西福建陝西雲南四川等處流寓各以
其省設一頭人夷人則有土目其次曰得暮麻色土
目多安姓大約田多而佃戶眾者即稱土目非官設
也夷民俱聽土目約束地方有命盜案及徵糧等事
皆責成土目協差分辦如鄉約然一州之中溫飽者
鮮貧人以苦苡為常食包穀燕麥佐之苗有白黑猓
獠狛家猓家龍家螻耳子土老花苗各種其俗俱詳
各處惟安插之回民頑黠者多漢夷交受其擾歷加
嚴懲尙未悛改無驛遞渡口由平山哨出畢節為赴
省赴川大道由中箐塘出水城為赴安順大道由猓

不九出鎮雄由可渡河出宣威爲赴滇大道僻路三
一通昭通一通東川一通夷良餘與本府同
畢節縣

畢節縣在府治北一百里省城西北四百里元爲順
元路宣慰司地明洪武十五年傅友德平烏撒諸蠻
置烏蒙衛于烏蒙地十六年奏請徙治于此因畢節
驛爲名隸貴州都司領守禦七星關後千戶所二十
二年分置赤水衛領摩泥白撒河落密赤水前所四
千戶所

國朝康熙二十六年改衛爲縣省赤水衛入焉雍正六

年割赤水河北大康里歸四川以四川鎮八屯隸焉
設知縣一教諭一訓導一典史一其境東至四川永
甯縣界一百五十里西至威甯州界九十五里南至
大定府界二十五里北至雲南鎮雄州界一百里東
南至大定永甯州界二百里東北至鎮雄永甯界八
十里西南至大定威甯界五十里西北至威甯鎮雄
界四十里廣袤四百餘里扼滇蜀之咽喉墾夷獮之
肘腋東自雪山而下南自雙山而上地勢平衍幾及
百里近城一水儼若濠塹昔人謂之畢川邑之得名
以此或云元設驛初時逢除夕故名曰畢節城周四

里三分計八百二十丈登以石門四本爲衛城明洪武二十年築

國朝乾隆四十三年重建城內爲長慶山東一里爲青螺山亦曰東山東二里爲崧山爲東壁山爲猿窩山四十里爲木稀山巉崖陡峻路裁容足昔設關守險之所也城南二里爲霽南山城西三里爲翠屏山天鼓山又西八十里爲七星山山有七峰置關其上楊慎云孔明禡牙之地也關下爲七星河源出威甯爲可渡河逕山下折而南逕雲南霑益州界入貴州境達粵西卽盤江之上流也兩崖壁削水出其中奔騰

澎湃險不可犯舊繫鐵絙以渡旣而架以七舟名曰應星橋後改建木橋覆以樓爲滇蜀通衢元末四川行省塔出脫帖木兒等戰敗賊于七星關明洪武中傅友德取七星關以通畢節築城其上蓋據此則三省之形勢呼吸可通也又西一百二十里爲香爐山爲青龍山城北二里爲北鎮山中通一徑上有北鎮關爲通雲南鎮雄之要隘城東北六十里爲層臺山洪武二十一年置衛于此後廢白崖在城北百里入川路所經撐天崖在城北十里周圍峯嶺明天啟中安邦彥叛軍民三百餘家立柵守之蠻賊不敢近豐

樂泉在城西十里平原沃野山水特秀猪場洞在城北三十里土人曾避兵于此鼉音洞在城南五十里中有水響如鳴鼓通天洞在城北十里中有蘭十數本名曰蘭瑩水出其中有聽魚石朝陽洞半仙洞遺珠洞繫星石諸勝永清河在城內自響水河流入城注于通津門之惠泉下入東門河響水河在城東北三里亦曰東門河當兩山間石梁橫亘水經三疊而下層湍迅激聲吼如雷下流入落折河赤水河在城北卽落折河舊名赤虺河唐駱賓王姚州露布河淪赤虺卽此水也虺音似水遂訛今名源出雲南鎮雄

州斑鳩井阿朗一百餘里至此又七十里至鄔家渡八十里至仁懷縣爲猿猴河達岷江杉木河在城東一百里土人伐木山中皆由此出下流入赤水河又龍溪亦入赤水河威鎮河在城東十里南加河在城南十里卽頭舖河惠泉在城東南通津門月城內明指揮林晟鑿今爲縣中洩水之區福井在城東普惠寺今呼爲雙井寺清甘異于他水龍潭在城東三里德溝在城東南十里平疇夾岸風景殊勝田畝東南低而西北高前此高處氣候多寒往往歉收近亦變易現在成熟田地三萬四千六百九十七畝有奇額

徵正米三千二百七十九石有奇小米四石有奇撥
入威甯黑章兵糈八百一十石有奇徵銀五百三十
五兩有奇常平倉貯穀一萬二千五百五十石兵糧
于秋米內支給餘米變價申解學額十五名建有崧
山書院場市九每歲額運貴西道督辦白鉛七百二
十八萬八千五百八十觔有奇黑鉛五十五萬三千
二百三十九觔有奇由縣運赴四川永甯鉛局局有
委員駐其地接收每歲運腳按季赴司請領稅口五
額徵稅課銀五百七十兩有奇稅羨銀三千三百一
十八兩有奇盈餘備地方公用通屬漢莊六十四苗

寨二十四零星散處者不與焉設一營五汛四十九
塘城中駐劄畢赤營遊擊一員守備一員把總二員
兵二百一十名分防石鼓坪把總一員兵四十五
名赤水河千總一員兵六十二名猪場堡把總一員
兵四十名七星關千總一員兵七十四名層臺汛把
總外委各一員兵三十八名邑俗多儉樸崇詩書然
每惑于形家風水之說往往致訟難解婚姻惟論門
戶不求財禮娶之日無論富貴貧賤婿必親至女家
行親迎禮女之兄弟隨輿送歸婦女不事紡織惟操
井臼間有織麻爲布者不足以供服用也疾病先巫

黔南誌圖卷二十六
九
而後醫卽紳宦之家亦未能免俗苗有猓獠龍家蔡
家狎子花苗數種而猓獠爲盛無土司管轄以田主
爲頭目尊曰某官尊其內曰官娘婚姻議牛馬多寡
爲財禮人死則擊鼓而哭旣殯創一高棚懸棺其上
眾戚繞行于下將葬往弔者每邀數十百人皆露處
擔酒椎牛晨夕往來繞棚三日謂之趕憂近今火葬
之風雖易而吹笙跳月未能盡革縣治爲四達通衢
東赴蜀西赴滇東南赴省皆屬大道並無捷徑詞訟
漢俗多爭佔陰地之事夷俗多負租奪佃之事餘與
府志同

